



Komunikadu Imprensa
Parlamentu Nasionál
19 Maiu 2016

Prezidente Parlamentu Nasionál Aderito Hugo da Costa afirma: JSMP nia-paraser no rekomendasaun sira nia kbi'it boot liu tanba reprezenta públiku nia-hanoin no interese

Ekipa JSMP ne'ebé kompostu hosi Direktór Ezekutivu JSMP, Luis de Oliveira Sampaio, Emanuel R Soriano, Koordenadór Interinu Unidade Outreach, Jose Pereira, Koordenadór Unidade Programa Monitorizasaun ba Parlamentu Nasionál no Mateus Xavier, peskizadór nomos observadór ba Parlamentu Nasionál halo audénsia ho Prezidente Parlamentu Nasionál (PN) eleitu Distintu Deputadu Aderito Hugo da Costa, iha gabinete Prezidente PN, iha 18 Maiu 2016.

Audénsia ne'e ho objetivu atu hato'o JSMP nia-observasaun, paraser no rekomendasaun sira ba Parlamentu Nasionál bazeia ba rezultadu monitorizasaun ne'ebé hala'o durante tinan hirak nia laran iha plenaria no Komisaun A Parlamentu Nasionál.

“Audénsia ne'e importante tebes atu fó hanoin no rekomenda ba Prezidente Parlamentu Nasionál foun atu bele aproveita efetivamente nia-mandatu ne'ebé limitadu hodi konsidera prioridade ba lei pendente sira, liuliu lei sira ne'ebé durante ne'e ema hotu ezije atu prodús no altera, nune'e bele husik hela hanesan istória no memória institusionál ida durante nia mandatu,” dehan Direktór Ezekutivu JSMP, Luis de Oliveira Sampaio.

Iha oportunidade ne'e, JSMP mós aproveita atu kongratula Prezidente Parlamantu eleitu, no hato'o mós apresiasaun ba mundansa pozitivu balun iha semana sira ikus kona-ba pontualidade deputadu sira nian iha plenaria ho lideransa foun ne'e. JSMP mós kongratula Prezidente Parlamentu Nasionál nia-maneira lideransa atu konsidera pedidu audénsia sira no liuliu atu konsidera JSMP ninia observasaun no rekomendasaun sira.

Aleinde ne'e, JSMP husu ba Prezidente PN atu rekonsidera fali prioridade ba ezbosu lei importante sira ne'ebé pendente no balun ne'ebé kadukadu ona iha Parlamentu Nasionál iha lejizlatura sira uluk no halo alterasaun no armonizasaun ba lei ezistente sira ne'ebé nesesáriu.

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Projetu Lei hirak ne'e inklui Projetu Lei Anti Korrupsaun, Pakote Lei ba Rai, Lei Reparasaun Nasionál no Institutu Memória Pública no husu atu koordena ho governu hodi adopta Kódigu Labarik no Lei Justisa Juvenile no alterasaun ba Kódigu Penál atu prevee inestru hanesan krime iha Kódigu Penál. JSMP mós rekomenda ba Prezidente atu konsidera ezijénsia públiku kona-ba alterasaun ba Lei Pensaun Mensál Vitalísia ne'ebé durante ne'e sai hanesan preokupasaun sentrál públiku nian.

Aleinde kestaun lejjizlasaun, JSMP mós ko'alia kona-ba asuntu relavante sira seluk hanesan amornizasaun relasaun entre órgaun soberanu sira, partikularmente Parlamentu Nasionál no Prezidente Repúblika. JSMP mós intrega JSMP nia-paraser ba Komisaun Reforma Lejjizlativu no diskute opsaun ba kestaun apoiu tékniku Parlamentu Nasionál nian, partikularmente asesór legál sira.

JSMP rekomenda atu halo kapasitasaun ba asesór legál timoroan sira, la'ós de'it kona-ba dezenvolve lei (*legal drafting*) maibé mós koñesimentu linguística, partikularmente Tetun padronizada. Ida-ne'e sei permite ezbosu lei sira iha Tetun atu bele fasilita asesu públiku nian, liuliu deputadu sira, nune'e sira bele kumpriente konteúdu ezbosu lei sira hodi bele partisipa efetivamente iha diskusaun sira.

Hatan ba kestaun sira ne'ebé JSMP apresenta no rekomenda ne'e, Prezidente Parlamentu hateten katak Pakote Lei ba Rai hatun ona ba Komisaun A, hahú ona diskusaun kona-ba alterasaun ba Lei Pensaun Mensál Vitalísia nian no iha possibilidade atu kria komisaun eventuál ida ne'ebé involve deputadu sira hosi bankada hotu hodi haree ba alterasaun lei sira ne'e. Prezidente subliña liutan katak sira halo ona analiza téknika ba Projetu Lei Anti Korrupsaun. Enkuantu kona-ba Projetu Lei Reparasaun no Institutu Memória Pública, Prezidente dehan katak nia sei no sei fó hanoin fali deputadu sira. Parlamentu dezenvolve hela planu atu bele tau prioridade ba Pakote Lei ba Rai no mós alterasaun ba lei sira kona-ba Pensaun Vitalísia antes resesu parlamentár ne'ebé hahú depoisde 15 Jullu to'ó 15 Setembru. Ezbosu lei sira seluk sei haree fali depoisde resesu parlamentár.

Antes konklui audénsia ne'e Prezidente Parlamentu hateten katak dala barak entre deputadu sira ko'alia la rona malu tanba mesak ema polítiku de'it, maibé JSMP nian paraser no rekomendasaun sira representa públiku nia hanoin no interese, tanba-ne'e iha forsa boot liu atu deputadu sira bele rona no konsidera.

Atu hetan tan informasaun, favór ida kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org